



Dei : namba 9 Oktoba 2024

Notis i go long public - No. 13 blong 2024

Takis blong 2% long kava we i go long narafala kantri

**Blong ol man we oli sanem kava long narafala kantri, ol man we oli helpem
ol man long saed blong Kastoms mo jenrol pablik**

Stat long **Fraede, namba 1 Novemba 2024**, Dipatmen blong Kastoms mo Takis bambae i ademap wan **takis blong 2%** long ol kava we i go long narafala kantri. Takis ia bambae i aplae long ol kaen kava olsem Piper metysticum [kava] we i olsem mins, Piper metysticum [kava] we oli katemap mo draem mo Piper metysticum [kava] we i paoda. Kaen kava ia i stap long lis blong Kastoms anda ol namba ia, **1211.90.10, 1211.90.20 mo 1211.90.30**.

Takis ia i kam insaed folem niufala loa namba 35 blong 2021 long saed blong Export Duties.

Takis blong sanem kava i go long narafala kantri hemi 2% FOB – we i minim Free on Board o fri long sip. Hemia i minem se man we i sanem / salem kava i go long narafala kantri bambae hem nao i karem kava i go kasem sip long pot we i stap long hem blong sanem i go mo man we i pem kava bambae hem nao i pem ol narafala praes we oli kam biae.

Takis ia blong 2% FOB blong sanem kava long narafala kantri i minem se man we i sanem i go bambae i mas pem 2% long totel praes blong kava [praes long kastoms] i go long gavman taem hemi wantem putum i go long sip. Oli wokemaot amaon blong takis ia folem praes we i stap long bil blong kago.

Ol impoten poen blong tingting long hem :

- **Blong wokemaot amaon blong takis :** Amaon blong takis hemi 2% blong FOB praes blong kava i go long narafala kantri. Eksampol : sapos FOB praes blong kava hemi VT1,000,000, bambae amaon blong takis hemi VT20,000.
- **Blong pem :** Yu mas pem takis ia long kasia blong Kastoms bifo oli save alawem kava i go aot.
- **Folem ol rul :** Yu mas mekemsua se yu wok folem ol rul long saed blong sanem kago i go long narafala kantri mo givim ol pepa we Kastoms i nidim. Hemia i ingkludum pemit blong sanem kago i go long narafala kantri, ol pepa blong Kastoms mo peimen blong eni narafala fi o takis sapos i gat.

Blong save moa, yu save kontaktem Disaen mo monitaring seksen long namba 33010 o sanem imel i go long : tarifftrades@vanuatu.gov.vu

Collins GESA
Aktiñ Daerakta
Dipatmen blong Kastoms mo Takis

